

**UNDANG – UNDANG KECIL**

**CETAKAN SEMULA**

**UNDANG - UNDANG KECIL PENGENDALI MAKANAN  
(MAJLIS BANDARAYA SUBANG JAYA) 2007**

Mengandungi segala pindaan hingga 10 Disember 2020.

DITERBITKAN OLEH  
JABATAN UNDANG-UNDANG  
MAJLIS BANDARAYA SUBANG JAYA  
2021

**AKTA KERAJAAN TEMPATAN 1976**

**UNDANG - UNDANG KECIL PENGENDALI MAKANAN  
(MAJLIS BANDARAYA SUBANG JAYA) 2007**

---

**SUSUNAN UNDANG-UNDANG KECIL**

---

**BAHAGIAN I**

**PERMULAAN**

Undang -  
Undang  
Kecil

1. Nama dan permulaan kuat kuasa
2. Pemakaian
3. Tafsiran

**BAHAGIAN II**

**KEBERSIHAN MAKANAN**

4. Bekalan air
5. Kebersihan tempat yang digunakan untuk persediaan atau jualan makanan
6. Makanan hendaklah disimpan jauh daripada habuk, dsb
7. Penjualan makanan yang tidak bersih dilarang
8. Kebersihan pengendali makanan
9. Orang yang dilarang mengendalikan makanan
10. Penggunaan sewajarnya kain bagi maksud membersihkan
11. Tempat yang dilarang bagi jualan atau persediaan makanan
12. Bekas simpanan yang dilarang
13. Pencemaran makanan
14. Menjual atau menyediakan makanan di tempat terbuka
15. Perkakasan
16. Pengendalian makanan
17. Membawa makanan
18. Pemeriksaan perubatan

**BAHAGIAN III**

**PENGUATKUASAAN**

19. Kuasa penangkapan
20. Kuasa menyita

## BAHAGIAN IV

### AM

Undang -  
Undang  
Kecil

21. Penalti am
22. Pendakwaan
23. Pengkompaunan kesalahan
24. Kuasa pegawai polis di bawah Undang-Undang Kecil ini
25. Pembatalan dan peruntukan peralihan

AKTA KERAJAAN TEMPATAN 1976

UNDANG - UNDANG KECIL PENGENDALI MAKANAN  
(MAJLIS BANDARAYA SUBANG JAYA) 2007

PADA menjalankan kuasa yang diberikan oleh seksyen 73 Akta Kerajaan Tempatan 1976 [*Akta 171*], Majlis Bandaraya Subang Jaya membuat, dan menurut seksyen 103 Akta itu, Pihak Berkuasa Negeri mengesahkan undang-undang kecil yang berikut:

BAHAGIAN I

PERMULAAN

**Nama dan permulaan kuat kuasa**

1. (1) Undang-Undang Kecil ini bolehlah dinamakan **Undang-Undang Kecil Pengendali Makanan (Majlis Bandaraya Subang Jaya) 2007**.

(2) Undang-Undang Kecil ini mula berkuat kuasa pada 19 Julai 2007.

**Pemakaian**

2. Undang-Undang Kecil ini hendaklah terpakai hanya bagi kawasan pentadbiran Majlis Bandaraya Subang Jaya.

**Tafsiran**

3. Dalam Undang-Undang Kecil ini, melainkan jika konteksnya menghendaki makna yang lain-

“jualan atau jual” termasuklah penjualan makanan untuk dimakan oleh manusia, barter atau pertukaran dan-

(a) penawaran atau percubaan untuk menjual apa-apa makanan sedemikian;

(b) menyebabkan atau membenarkan apa-apa makanan sedemikian untuk dijual;

(c) mendedahkan, menerima, menghantar atau menyerahkan apa-apa makanan sedemikian untuk jualan;

(d) membekalkan apa-apa makanan sedemikian jika balasan akan diterima oleh pembekal bagi bekalan itu sama ada secara khusus atau sebagai sebahagian daripada perkhidmatan yang dikontrakkan; dan

- (e) memiliki apa-apa makanan untuk jualan atau memiliki apa-apa makanan dengan mengetahui bahawa ia mungkin akan dijual, ditawarkan atau didedahkan untuk jualan;

“makanan” termasuklah setiap benda yang digunakan untuk makanan atau minuman oleh manusia atau yang dimasukkan ke dalam atau digunakan di dalam persebatian atau persediaan apa-apa benda sedemikian dan termasuklah juga bahan pewarna, perasa dan perencah, tetapi tidak termasuk –

- (a) benda atau bahan yang digunakan hanya sebagai ubat;
- (b) binatang atau burung yang hidup; atau
- (c) makanan ternakan atau barang makanan bagi binatang, burung atau ikan;

“persediaan” termasuklah pengilangan, pembungkusan, serahan, pengangkutan, simpanan dan menghidangkan makanan;

“Pihak Berkuasa Melesen” ertinya Datuk Bandar Majlis Bandaraya Subang Jaya, Setiausaha atau mana-mana pegawai yang diberi kuasa secara bertulis lesen oleh Datuk Bandar.

## BAHAGIAN II

### KEBERSIHAN MAKANAN

#### **Bekalan air**

4. Tiada seorang pun yang terlibat dalam jualan atau persediaan untuk jualan makanan boleh menggunakan bagi apa-apa maksud yang berkaitan dengan jualan atau persediaan makanan itu-

- (a) apa-apa air selain air dari paip yang disambungkan kepada paip air utama dari bekalan air awam; atau
- (b) apa-apa air dari paip atau sumber lain daripada tandas.

#### **Kebersihan tempat yang digunakan untuk persediaan atau jualan makanan**

5. (1) Setiap orang yang terlibat dalam jualan atau persediaan untuk jualan makanan hendaklah memastikan pada setiap masa, bahawa tempat yang digunakan untuk jualan atau persediaan itu bersih.

(2) Setiap orang yang terlibat dalam jualan atau persediaan untuk jualan makanan hendaklah memastikan bahawa apa-apa jalan, laluan atau ruang yang betul-betul di hadapannya, di belakangnya atau bersebelahan dengan tempat yang digunakan untuk jualan

atau persediaan itu berada dalam keadaan bersih dan bebas dari himpunan benda berbahaya, kotor, sampah-sarap, sampah atau bahan atau benda lain yang dibuang olehnya.

**Makanan hendaklah disimpan jauh daripada habuk, dsb**

6. Setiap orang yang terlibat dalam jualan atau persediaan untuk jualan apa-apa makanan hendaklah memastikan pada setiap masa bahawa segala bekas, perkakas, kenderaan, barang, alat, kerusi-meja, kelengkapan, jentera atau apa-apa perlengkapan yang digunakan bagi atau berkaitan dengan makanan itu, berada pada setiap masa dalam keadaan bersih dan bebas daripada kotoran dan habuk, bau busuk, binatang perosak, lalat dan serangga lain.

**Penjualan makanan yang tidak bersih dilarang**

7. (1) Tiada seorang pun boleh menjual apa-apa makanan yang tidak bersih atau mengandungi apa-apa benda yang-

- (a) tidak menjadi sebahagian daripada makanan itu;
- (b) digunakan dalam komposisi; atau
- (c) digunakan untuk persediaan makanan.

(2) Tiada seorang pun boleh menjual atau membungkus untuk jualan apa-apa makanan dalam bungkusan yang tidak bersih.

**Kebersihan pengendali makanan**

8. (1) Setiap orang yang terlibat dalam jualan atau persediaan untuk jualan makanan hendaklah bila ia terlibat sedemikian menyenggara pakaiannya dan badannya dalam keadaan bersih.

(2) Setiap orang yang terlibat dalam jualan atau persediaan untuk jualan makanan hendaklah, pada setiap kali-

- (a) sebelum memulakan jualan atau persediaan itu;
- (b) selepas keluar dari tandas, bilik air atau apa-apa tempat kemudahan lain; atau
- (c) selepas menyentuh atau memegang apa-apa benda atau permukaan atau tubuh yang tidak bersih,

membasuh tangan sebersih-bersihnya dengan sabun dan air bersih.

(3) Tiada seorang boleh meludah, membuang hingus, merokok atau menggunakan tembakau atau bahan sedutan atau mana-mana persediaan lain atau mengunyah daun sirih atau pinang semasa terlibat dalam jualan atau persediaan bagi jualan apa-apa makanan.

(4) Tiada seorang pun yang luka atau melelas kulit pada mana-mana tangan atau jarinya boleh terlibat dalam jualan atau persediaan bagi jualan makanan melainkan jika luka atau kulit yang melelas itu dibalut rapi dengan pembalut kalis air.

(5) Setiap orang hendaklah setiap masa memakai apron dan penutup kepala semasa jualan atau persediaan bagi penjualan apa-apa makanan dan hendaklah memastikan apron dan penutup kepala tersebut dalam keadaan bersih pada setiap masa.

### **Orang yang dilarang mengendalikan makanan**

9. Tiada seorang pun—

- (a) menghidap apa-apa penyakit yang merebak; atau
- (b) membawa apa-apa penyakit berjangkit; atau
- (c) menghidap apa-apa jua keadaan menyebabkan keluarnya nanah atau serum dari mana-mana bahagian badan atau penyakit kulit lain; atau
- (d) mempunyai sebab untuk mempercayai atau mengesyaki bahawa ia berkemungkinan menyebarkan organisma yang membiakkan penyakit; atau
- (e) ada membuat perhubungan dengan mana-mana orang yang menghidap penyakit yang merebak; dan
- (f) tidak mendapatkan imunisasi demam kepialu dan apa-apa penyakit yang diarahkan oleh Majlis dari semasa ke semasa.

boleh terlibat dalam pengilangan, persediaan, pembungkusan, penghantaran, pengangkutan, penyimpanan, penghidangan atau mengendalikan apa-apa bahan makanan untuk jualan atau apa-apa benda yang digunakan atau mungkin digunakan sebagai pembalut atau bekas simpanan bagi makanan.

### **Penggunaan sewajarnya kain bagi maksud membersihkan**

10. Tiada seorang pun boleh menggunakan bagi maksud mengelap, membersihkan atau menggilap apa-apa makanan untuk dijual atau apa-apa pembungkus atau alat yang digunakan berhubung dengannya, apa-apa kain buruk atau penyapu habuk selain kain yang dikhaskan bagi tujuan mengelap atau membersihkan atau menggilap makanan dan kain tersebut hendaklah dipastikan dalam keadaan bersih pada setiap masa.

### **Tempat yang dilarang bagi jualan atau persediaan makanan**

11. (1) Tiada seorang pun boleh menjual atau menyediakan untuk jualan apa-apa makanan di dalam mana-mana tandas atau tempat yang seumpamanya atau di mana-mana tempat yang pada bila-bila masa digunakan untuk tidur atau yang dihubung terus dengan ruang tidur, tandas atau mana-mana tempat dimana apa-apa binatang atau burung dibiarkan berada.

(2) Tiada seorang boleh menjual atau menyedia bagi jualan apa-apa benda makanan di mana-mana tempat di mana apa-apa benda, binatang atau burung disimpan atau apa-apa kerja dijalankan dengan mana benda makanan itu boleh tercemar atau keadaan tidak baik atau kebersihannya terjejas.

(3) Tiada seorang pun boleh meletak, menyimpan, membawa, menyebarkan atau mengguna atau menyebabkan diletak, disimpan, dibawa, disebar atau diguna di mana-mana tempat yang digunakan untuk jualan atau persediaan apa-apa makanan, apa-apa racun atau apa-apa jirim yang beracun atau menjijikkan atau apa-apa material lain yang mungkin mencemar keadaan baik makanan itu, tetapi tiada apa-apa di dalam perenggan ini boleh menahan penggunaan betul semburan campuran yang mengandungi racun bagi maksud mengawal serangga atau serangga perosak lain.

### **Bekas simpanan yang dilarang**

12. (1) Tiada seorang pun boleh menyertakan, membawa atau menyimpan dalam apa-apa makanan untuk jualan dalam mana-mana beg, karung atau bekas apa-apa makanan untuk jualan jika bekas itu pernah pada bila-bila masa mengandungi atau pernah digunakan bagi membawa apa-apa racun atau bahan yang memudaratkan atau apa-apa bahan yang mungkin akan menjadikan makanan itu rosak atau tidak sesuai untuk dimakan oleh manusia.

(2) Tiada apa-apa peti, bakul atau bekas lain yang tidak bersih boleh digunakan untuk mengisi atau persediaan apa-apa makanan untuk jualan.

### **Pencemaran makanan**

13. (1) Tiada seorangpun boleh meletakkan apa-apa makanan bagi jualan atau mana-mana bungkusan yang mengandungi makanan bagi jualan hingga tersentuh dengan apa-apa plastik, logam atau objek lain, benda atau bahan untuk dijual atau diberi kepada pembeli ketika jualan makan melainkan jika objek, benda atau barang sedemikian itu dibalut sepenuhnya dalam suatu pembungkusan yang dibuat dari bahan yang tidak mencemarkan makanan itu dan yang tidak mengandungi bahan yang mungkin diserap atau ada kemungkinan meresap kedalam makanan dan tiada seorang boleh meletakkan apa-apa benda atau bahan sedemikian dalam apa-apa makanan dengan sebegitu cara hingga ianya bercampur atau dilitupi dengan makanan itu.

(2) Setiap orang yang menjual apa-apa makanan yang biasa dimakan dalam keadaan ianya dijual hendaklah menjaga makanan itu, sehingga ianya diterima oleh seseorang pembeli, dengan menyimpan dalam bekas tertutup atau dengan cara lain yang berkesan.



(3) Tiada seorang boleh membawa untuk jualan apa-apa benda makanan yang biasa dimakan dalam keadaan ianya dijual melainkan jika ianya dibungkus atau diletak di dalam bekas atau bungkusan lain yang sengaja dibentuk bagi menghindar benda makanan itu dari tercemar.

(4) Tiada seorang boleh membawa, meletak atau mendeposit atau dibenarkan membawa, meletak, atau mendeposit dalam mana-mana kenderaan yang digunakan bagi membawa apa-apa benda makanan yang biasa dimakan dalam keadaan ianya dijual, mana-mana kotoran, benda yang mengganggu atau material lain yang mungkin mencemar, keadaan baik atau kebersihan benda makanan yang dibawa di dalamnya.

(5) Tiada seorang boleh mengguna berkaitan dengan penjualan atau persediaan bagi jualan bagi apa-apa benda makanan yang biasa dimakan dalam keadaan ianya dijual, apa-apa kertas yang terdapat bahan tulisan atau cetakan di atasnya mengikut apa jua cara di mana makanan itu boleh tersentuh dengan bahan tulisan atau cetakan itu.

(6) Tiada seorang boleh menjual apa-apa benda makanan yang biasa dimakan dalam keadaan ianya dijual, yang telah jatuh, diletak atau disimpan atas mana-mana kaunter, bar atau lantai melainkan jika ianya dijaga atau dibungkus supaya terhindar benda makanan itu dari kemungkinan tercemar.

### **Menjual atau menyedia makanan di tempat terbuka**

14. Tiada seorang pun boleh menjual atau menyediakan untuk dijual apa-apa makanan di mana-mana premis, jalan atau di mana-mana tempat terbuka lain yang tingginya kurang daripada 0.5 meter dari permukaan lantai atau jalan atau kawasan lapang itu.

### **Perkakasan**

15. (1) Tiada seorang pun boleh mengguna atau menghidang makanan bagi jualan apa-apa perkakasan makanan atau minuman yang tidak dibersihkan selepas pemakaian yang terakhir yang mana perkakasan itu telah digunakan sama ada atau tidak alat itu diberi kepada orang yang sama sebelum itu menggunakan perkakasan tersebut.

(2) Tiada seorang pun boleh menggunakan apa-apa perkakasan makanan atau minuman bagi menghidangkan makanan untuk jualan jika perkakasan itu tidak bersih.

(3) Tiada seorang boleh menggunakan atau terdapat dalam milikannya untuk kegunaan bagi jualan atau persediaan bagi jualan apa-apa makanan, bekas minuman, pinggan, piring atau bekas simpanan lain yang sumbing, pecah atau retak.

### **Pengendalian makanan**

16. (1) Setiap orang yang menjual atau menyedia untuk jualan apa-apa makanan yang biasa dimakan dalam keadaan ianya dijual tidak boleh semasa penjualan atau persediaan itu—

- (a) mengendali atau membenarkan pengendalian apa-apa makanan dengan jarinya tetapi hendaklah menggunakan pencedok, penyepit atau perkakas lain yang sesuai bagi maksud sedemikian;
- (b) menyentuh mana-mana bahagian badan sendiri atau orang lain;
- (c) menghembus nafasnya untuk membuka mana-mana beg atau pembalut;
- (d) menyapu tangannya ke atas bajunya atau dengan apa-apa cara selain dengan tuala atau kain yang bersih;
- (e) meletak sehingga menyentuh makanan bagi jualan, apa-apa bahan atau benda yang kotor atau mungkin mencemar makanan itu, atau yang telah disentuh dengan mulut;
- (f) batuk atau bersin berhampiran mana-mana makanan; atau
- (g) melakukan apa-apa perbuatan yang boleh mencemarkan makanan.

(2) Pencedok, penyepit atau perkakas lain yang sesuai bagi mengendali apa-apa makanan yang biasa dimakan dalam keadaan ianya dijual hendaklah sentiasa bersih.

(3) Tiada seorang yang bekerja menjual atau menyedia bagi jualan apa-apa makanan boleh menyentuh dengan mulut apa-apa alatan yang digunakan untuk atau berkaitan dengan jualan atau persediaan itu;

(4) Tiada seorang yang bekerja menjual atau menyedia bagi jualan apa-apa makanan yang biasa dimakan dalam keadaan ianya dijual boleh membawa apa-apa alatan atau perkakasan yang digunakan untuk atau berkaitan dengan jualan atau penyediaan itu dengan cara yang boleh menjejaskan keadaan baik, kebersihan atau kebebasan makanan itu dari pencemaran.

### **Membawa makanan**

17. (1) Tiada seorang pun boleh menggunakan apa-apa kenderaan, pengangkutan atau bekas yang tidak bersih untuk membawa atau menyerahkan apa-apa makanan untuk dijual.

(2) Tiada seorang boleh mengguna apa-apa kenderaan, pengangkutan atau bekas untuk membawa atau mengisi apa-apa binatang, burung, bahan atau benda lain yang boleh mencemarkan kebersihan atau kebebasan dari pencemaran-

- (a) apa-apa makanan untuk jualan;
- (b) kenderaan, pengangkutan atau bekas untuk membawa atau mengisi makanan untuk jualan tersebut; atau

(c) bekas yang biasa dibawa atau diisi makanan untuk jualan tersebut.

### **Pemeriksaan perubatan**

18. (1) Mana-mana orang yang bekerja atau terlibat dalam jualan atau persediaan untuk jualan apa-apa benda makanan hendaklah menjalani pemeriksaan perubatan tentang kesihatannya sekurang-kurangnya setahun sekali.

(2) Pemeriksaan itu hendaklah dijalankan oleh pegawai perubatan atau kesihatan, yang dilantik berdaftar di bawah Akta Pengamal Perubatan 1971 [*Akta 50*].

(3) Jika mana-mana orang setelah diperiksa didapati oleh pegawai perubatan atau kesihatan mengidap penyakit merebak atau berjangkit atau apa-apa penyakit kulit yang merbahaya atau yang pada pendapat pegawai perubatan atau kesihatan berkemungkinan merupakan punca jangkitan, Pihak Berkuasa Melesen hendaklah serta-merta menghilangkan kelayakan orang yang diperiksa itu daripada bertugas atau bekerja di mana-mana tempat yang digunakan untuk jualan atau persediaan untuk jualan apa-apa makanan sehingga disahkan oleh pegawai perubatan atau pegawai kesihatan bahawa dia telah sembuh atau tidak lagi berkemungkinan menjadi punca jangkitan.

(4) Mana-mana orang—

- (a) yang enggan menjalani suatu pemeriksaan perubatan bila diminta melakukan; atau
- (b) yang setelah diperiksa dan hilang kelayakan, meneruskan tugas di mana-mana tempat yang digunakan bagi menjual atau persediaan untuk jualan apa-apa benda makanan,

adalah melakukan suatu kesalahan.

(5) Tuan punya, pemegang lesen, penduduk atau penjaga mana-mana tempat yang diguna bagi menjual atau menyedia untuk jualan apa-apa benda makanan, yang setelah diberitahu dengan bertulis oleh Pihak Berkuasa Melesen bahawa seseorang yang bertugas bagi jualan makanan telah enggan menjalani pemeriksaan perubatan atau setelah diperiksa hilang kelayakan dari bertugas, membenarkan orang itu meneruskan tugas di dalamnya atau tinggal di dalam kawasan sekitarnya hendaklah bersalah atas suatu kesalahan di bawah undang-undang kecil ini.

BAHAGIAN III  
PENGUATKUASAAN

**Kuasa penangkapan**

19. (1) Datuk Bandar atau mana-mana pegawai diberi kuasa boleh menangkap tanpa waran mana-mana orang-

(a) yang semunasabahnya dipercayai olehnya telah melakukan suatu kesalahan di bawah Undang-Undang Kecil ini; atau

(b) yang enggan memberikan nama dan alamatnya apabila diminta atau jika ada sebabuntuk meragui ketepatan nama dan alamat yang diberikan.

(2) Seseorang yang ditangkap di bawah undang-undang kecil ini hendaklah dibawa ke balai polis dan hendaklah dibawa ke hadapan seorang Majistret dalam masa dua puluh empat jam, melainkan jika sebelum dari masa itu nama dan kediamannya yang sebenarnya telah dapat ditentukan, dan dalam hal yang sedemikian orang itu hendaklah dilepaskan dengan serta-merta apabila dia menyempurnakan suatu bon untuk hadir di hadapan seorang Majistret jika dikehendaki sedemikian.

(3) Apabila mana-mana orang sedemikian dibawa ke hadapan seorang Majistret, Majistret itu boleh sama ada menghendaki dia menyempurnakan suatu bon, dengan atau tanpa penjamin untuk hadir di hadapan seorang Majistret sekiranya dikehendaki, atau boleh memerintahkan supaya dia ditahan dalam jagaan sehingga dia dapat dibicarakan.

**Kuasa menyita**

20. (1) Mana-mana pegawai diberi kuasa boleh menyita atau mengalihkan apa-apa barang atau benda yang menyalahi Undang-Undang Kecil ini dengan risiko ditanggung oleh pemunya.

(2) Apa-apa benda atau barang yang disita di bawah perenggan (1) ini adalah daripada jenis yang mudah rosak atau yang mengikut sifatnya lekas rosak atau jika penjagaan benda atau barang itu melibatkan perbelanjaan dan kesusahan yang tidak munasabah, atau dipercayai akan membahayakan orang ramai, pegawai diberi kuasa boleh mengarahkan supaya benda atau barang itu dilupuskan mengikut cara yang ditentukan oleh Majlis.

(3) Mana-mana orang yang menuntut apa-apa benda atau barang selain benda atau barang yang disita di bawah perenggan (2), boleh menuntut benda atau barang tersebut daripada Majlis dalam tempoh minima tujuh hari bekerja atau maksima satu bulan dari tarikh benda atau barang itu disita tertakluk kepada apa-apa syarat dan pembayaran yang dikenakan oleh Pihak Berkuasa Melesen.

(4) Sekiranya, tiada apa-apa tuntutan dibuat selepas tempoh tiga puluh hari, Majlis bolehlah melupuskan benda atau barang itu mengikut cara yang ditentukan Majlis dan apa-

apa hasil yang diperoleh hendaklah dikreditkan kepada Kumpulan Wang Pihak Berkuasa Tempatan.

(5) Datuk Bandar atau mana-mana pegawai diberi kuasa tidaklah bertanggung kepada mana-mana orang bagi apa-apa kemerosotan, walau apa pun sebabnya, dalam kualiti apa-apa benda atau barang yang disita di bawah Undang-Undang Kecil ini.

## BAHAGIAN IV

### AM

#### **Penalti am**

21. Seseorang yang melakukan suatu kesalahan di bawah Undang-Undang Kecil ini yang baginya tiada penalti diperuntukkan dengan nyata boleh apabila disabitkan, didenda tidak melebihi dua ribu ringgit atau dipenjara selama tempoh tidak melebihi satu tahun atau kedua-duanya, dan dalam hal sesuatu kesalahan yang berterusan boleh sebagai tambahan didenda tidak melebihi dua ratus ringgit bagi setiap hari kesalahan itu terus dilakukan.

#### **Pendakwaan**

22. Tiada pendakwaan boleh dimulakan terhadap kesalahan di bawah Undang-Undang Kecil ini kecuali oleh atau dengan keizinan Pendakwa Raya.

#### **Pengkompaunan kesalahan**

23. (1) Datuk Bandar, Setiausaha atau Pegawai Undang-Undang Majlis boleh mengkompaun mana-mana kesalahan yang dilakukan di bawah Undang-Undang Kecil ini dan ditetapkan sebagai kesalahan yang boleh dikompaun dengan membuat suatu tawaran bertulis kepada orang yang disyaki telah melakukan kesalahan itu untuk mengkompaun kesalahan itu apabila dibayar kepada Majlis sejumlah wang yang tidak melebihi satu ribu ringgit bagi kesalahan itu dalam tempoh yang dinyatakan dalam tawaran itu.

(2) Sesuatu tawaran di bawah perenggan (1) boleh dibuat pada bila-bila masa selepas kesalahan itu dilakukan tetapi sebelum apa-apa pendakwaan baginya dimulakan, dan jika jumlah yang dinyatakan dalam tawaran itu tidak dibayar dalam tempoh yang dinyatakan dalam tawaran itu atau dalam apa-apa tempoh lanjutan sebagaimana yang dibenarkan oleh Datuk Bandar atau Setiausaha atau Pegawai Undang-Undang Majlis, pendakwaan terhadap kesalahan itu boleh dimulakan pada bila-bila masa selepas itu terhadap orang yang kepadanya tawaran itu telah dibuat.

(3) Jika suatu kesalahan telah dikompaun di bawah perenggan (1), tiada pendakwaan boleh dimulakan selepas itu berkenaan dengan kesalahan itu terhadap orang yang kepadanya tawaran untuk mengkompaun telah dibuat dan apa-apa benda yang disita berkaitan dengan kesalahan itu hendaklah dilepaskan, tertakluk kepada apa-apa terma dan syarat yang ditetapkan.

(4) Kesemua wang yang diterima di bawah undang-undang kecil ini hendaklah dibayar kepada kumpulan wang yang diwujudkan di bawah mana-mana undang-undang yang berhubung dengan kerajaan tempatan.

**Kuasa pegawai polis di bawah Undang-Undang Kecil ini**

24. Tiada apa-apa jua yang terkandung dalam Undang-Undang Kecil ini boleh mengurangkan kuasa seseorang pegawai polis untuk menyiasat apa-apa kesalahan di bawah Undang-Undang Kecil ini.

**Pembatalan dan peruntukan peralihan**

25. (1) Undang-Undang Kecil Pengendalian Makanan (Majlis Daerah Petaling ) 1993 [*Sel. P.U 17/93*] dibatalkan.

(2) Apa-apa notis, perintah, kompaun, lesen, borang, surat kebenaran, pelantikan yang telah dikeluarkan atau dibuat di bawah Undang-Undang Kecil yang dibatalkan atau yang dibuat dahulu hendaklah terus terpakai dan berkuat kuasa, setakat yang tidak bertentangan dengan Undang-Undang Kecil ini seolah-olah telah dikeluarkan atau dibuat di bawah Undang-Undang Kecil ini sehingga dibatalkan.

Dibuat oleh Majlis Perbandaran Subang Jaya dalam mesyuaratnya pada 31 Mac 2007.

**ADNAN BIN HAJI MD IKSHAN**

*Yang Dipertua*

*Majlis Perbandaran Subang Jaya*